



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

**Iran-i US dang Strait of Hormuz
nungi pila alitsü metetdaksü**

**Inter Milan-i Serie A
21benbuba kokogo**



VOL. XXIII ISSUE NO. 201 (ADOK 201) DIMAPUR SANGTENNÜ (TUESDAY) MONUPII (MAY) 05, 2026

₹ 5.00

Nagaland Governor-i Monsoon Preparedness atema senden amen

Dimapur, May 4, 2026 (TYO): Nagaland Governor Nand Kishore Yadav-i May 4, 2026 nü Monsoon Preparedness meyipa reprangshiba senden ka ayonga menogo.

Naga Bhavan Conference Hall, Lok Bhavan, Kohima nung amenba senden nung Home Commissioner Abhijit Sinha, IAS-i 2026 tzungluruwa atema sentong renemba lemsatop.

India nung El Niño ajanga tzunglu ajema arutsü akok saka Nagaland nungbo akhi ama nungi talila arutsü ta Abhijit Sinha-i ashi.

Taküm tzungluruwa mapang ajungben tzumetsung, anentsüh aser tzunglu aruba yimya melenshitsu akok ta paisa ashi.

Senden nung Department balalai district-wise preparedness sentongtem metetdaksü aser iba nung control rooms amenoktsü, machinery agütsütsü aser lendong ataloktsü ana nung aliba lenmangtem jangjaba dena lir.

National Highways aser

lenmang tongtipang ajak nung tenük yokdar aser rongdak mapang amshitsu tanga lenmangtem jangjaogo ta Public Works Department (PWD)-ia ashi.


Kohima District Administration-ia action plan lemsatopba nung task forces, traffic management, medical preparedness aser essential commodities supply indang sentongtem renemba dena liasü.

Governor Yadav-i department ajak amalitepa inyaksü, mapang shitak nung yaritsü aser public nem osang shitak prokshitsu indang ashi.

Paisa bangdak agencies dang zungzunga alitsü aser tzungluruwa mapang timtem ajemtsü atema teinyaktsütem inyaksü tetuyuba agütsü.

Iba senden nung NSDMA, PWD, NHIDCL, District Administration aser SEWAK nungi tongti ketdangsurtem aden.

Koridang by-election nung Daochier I. Imchen-i takok angu



Daochier I. Imchen-i Returning Officer, Nockpai Konyak, SDO (C) Mokokchung ket nungi Certificate of Election agizükdang agiba noksa ka angur.

Dimapur, May 4, 2026 (TYO): 28 Koridang (ST) Assembly constituency by-election nung BJP candidate Daochier I. Imchen-i takok nguogo.

Daochier-i pa den anasatiba toktepba Independent candidate Maj (ret'd) Toshikaba madak votes 3,123 agi takok angu. Daochier-i votes 7,317 aser Toshikaba-i votes 4,194 angu.

Hombarnü election result sangdongba sülen Mokokchung DC office nung Mokokchung Returning Officer Nockpai Konyak-i Daochier Imchen nem certificate of election agütsü.

April 9, 2026 nü agiba Koridang Assembly constituency by-election nung candidate ajak agi parnok 6 lir.

Parnok rongnungi Independent candidate Imtiwapang-i votes 3,633,

National People's Party candidate I. Abenjang-i votes 3,219, Independent candidate Imchatoba Imchen-i votes 147 aser Congress candidate T. Chalukumba Ao-i votes 144 angu.

28 Koridang (ST) Assembly constituency nung vote enoktsür ajak agi nisung 22,506 lir aser tan by-election nung votes 18,745 enokja liasü.

Tan election nung vote enoktsür 82.21% liasü aser NOTA votes 48 aser rejected votes 43 liasü.

CEC Nagaland-i metetdaksür

May 4, 2026 nü Counting Centre ka nung 28-Koridang Assembly Constituency by-election indang votes takok ngua zungtemogo ta Chief Electoral Officer, Nagaland-i metetdaksü.

Counting centre nung candidates/election agents aser counting agents lia votes azung aser counting agents 51-i votes azungba maparen reprangogo. Votes zungtemba sülen Returning Officer-i osang metetdaksü.

Votes zungtemba sülen candidates/ parnok atema teshimtet nübotem lia VVPATs nungi VVPAT slips agizük. VVPAT slips ji envelopes tanak nung sepbanger strong room nung ayu aser iba ya CCTV coverage aser security lia inyak. Maneni strong room nung mayudang candidates/ parnok atema teshimtet nübotem lia EVMs jungjunga shibang.

Election Commission of India-i lateta aliba ama bangdak High Court ajanga Election Petitions ajunga metembang tashi EVMs ya strong room nung ayutsü.

Assam nung kümsük asemen atongtepa NDA sorkar akümstsü

Guwahati, May 4, 2026 (Agencies): Assam nung NDA-i kümsük asemen atongtepa sorkar akümstsü kechiyong BJP-i aniba teloktepi majority mark adenogo aser menden 100 tema nung takok ngutetogo.

Homban aonung tashi nung votes azungba maparen tembanga arudang BJP-i menden 81 nung takok nguogo aser parnok den yariteper Bodo Peoples' Front (BPF) aser Asom Gana Parishad (AGP) ajanga menden terer nung takok ngutetogo.

Congress-i aniba Opposition teloktepi BJP-i aniba NDA menokdangtet aser Congress-i menden 20 tema nung takok mengutettsü ama lir.

Iba tamakok atema Congress General Secretary aser Assam election in-charge Bhanwar Jitendra Singh-i tebilemstsü khuret ajak agia menden nungi aluogo.

Assam Chief Minister Himanta Biswa Sarma-i nübortem dang pelaba metetdaksü aser Hindu Congress lennir tajungtemi BJP nung adentsü aser state tarutsü yangertsü atema ayongzükogo.

"Bangladeshi Miya" nungeri atsünga agiba anema raratsü atema BJP nung denang ta CM Sarma-i Congress lennirtem ayongzük.

Assam nung district 35 prongla nung counting centre 40

nung votes azünger aser district teimba ka nung constituency ajak ayima centre kaka dang lir. Ajisüaka Nagaon district nung centre asem nung aser Kokrajhar, Tinsukia o Jorhat nung centre anana nung azünger.

Taküm assembly election nung Congress candidate Gaurav Gogoi-i Jorhat nung BJP candidate Hitendra Nath Goswami tsüngdang tamakok nguogo. Külén, Guwahati Central nung Gen Z candidate Kunki Chowdhury-i BJP veteraan Vijay Gupta tsüngdang tamakok angu. Maneni, BJP nungi Pijush Hazarika-i Jagiroad menden nung takok nguogo.

Chief Minister Dr. Himanta Biswa Sarma-ia Jakulbari constituency nungi maneni takok nguogo.

Assam nung tanep 8:00 ako nungi votes azungtsü tenzüka liasü aser Assembly constituency 126 nungi candidate 722 den parnok observers aser pusemertemi counting centres 40 prongla nung adenshia liasü.

2026 Assam Assembly elections nung vote enoktsür 1% temai 'None of the Above' (NOTA) option amshioogo.

Assam nung vote enoktsür 1.29% shi kati NOTA shim ta Election Commission of India-i metetdaksü.

Taküm Assam assembly elections nung vote enoktsür 85.64% liasü.

Tuophema o Ungma aksü ajanga Nagaland rangben indang bilemba tanaben yanglushidi: Dr. S.C Jamir

Sashimeren Jamir Mokokchung, 4th May (TYO):

Tuophema aser Ungma yim na tsünga "Rüna Khrietho - Maong Aksü" tenzüker kum 25 ajungba sentong ka 2nd May, 2026 nü Ungma nung amungdang, Tetushi Tejaoker taoba Nagaland Chief Minister, taoba Maharashtra, Goa, Gujarat & Odisha Governor aser Padma Bhushan Awardee Dr. S.C Jamir-i Naga nung dang tesüiba mapang telemsa aliba nungi pilar Nagaland ka kuma lungjem yimjiyimjung asoshi inyaksü ayongzük tulu agütsü.

Iba aksü tenzüka mapang sorkar nung ni tokolakba aser Neiphui Rio kü den tatong liasü. Nagaland nung Ao aser Angami naji kin tulu ana lir aser kin ana tsünga tembar yimtepba kin telungjem asoshi tatishitsu ka ama bilem, aser Naga nungertemi chilongchilonga aser telungjem kibong ka asütsü yongya aser Rio küna mission ji ibaji liasü. Naga nungjeri lungjema, tepela kibong



Dr. S.C Jamir

25 tejaklen Nagaland nung aliba nüburtem tangatetba khenyongi balaka liasü. Nagaland nung nisung shia mulungjang nung yimjiyimjung tasen ka asoshi yongyaseta liasü. Asen lima telungjem, tesüner aser yimjung alitsü atema kin ajak nungi aser nisung shiai ayimten. Naga nung rongnung iba mapang nung 'ism' maliasü, aser civil society telok tematibaji ka dang aser ibaji "Naga Hoho" liasü, aser kin hoho ajak tensa den putepa timi inyaksangshia liasü, ta ashi.

Kodang temelenshi ka ataloktsüsa kümdir, nisung karibo achayangtsüsa akümer. Aji oda, Nagaland telungjem, tubur tajung ka yangertsü asoshi oshi aser yim balala süaka, telungjem yim ka kümettsü akok ta sayutsübaji o agi masü saka mapa ajanga sayutsü tongtibangtiba nükjidong liasü. Ibai longsolongben benjong ka dangbo masü saka temulungjang aser tanela lungjemtsüla, ta paisa shisem.

(Maneni tapak 2 nung...)

GHSS Kigwema indang school ki tasen ka semzükogo



Commissioner & Secretary, School Education & SCERT, Kevileno Angami-i May 4, 2026 nü Kohima district kübok Government Higher Secondary School, Kigwema indang school ki tasenba semzüksüdang tangokba noksa nung angur.

Kohima, Monupii/May 04 (TYO): Kohima district kübok Government Higher Secondary School Kigwema indang school ki tasenba May 4, 2026 nü Commissioner & Secretary, School Education & SCERT, Govt. of Nagaland, Kevileno Angami-i semzüksüogö. Iba ki ya Samagra Shiksha Nagaland kübok yanglua liasü. Kevileno-i iba sentong nung jembidang, school nung tesayuba shidak aser tajung alitsü nükjidong nung iba ki ya yanglu ta ashi.

Lai nüburttem dang iba ki anepalutsü aser kaketshirtem ajangzükdaksütsü ayongzükä liasü. School indang result ajungba asoshi lai tenüngsang agütsü aser ano enrolment aser academic performance tajungba akumtsü asoshi mangdang ayutsü lai ayongzükä liasü. Sentong nung Kigwema Village Council chairman Khomeze Mera-ia o tatsüka jembia liasü. Iba sentong nung GHSS Kigwema principal Rose Chishi menden liasü aser Rev.

Mekhale Yhoshii, pastor, Kigwema Baptist Church ajanga Tsüngrem temoatsü jazüka sarasadem. Sentong tambanga KYO tir aser SMDC züngsem Neiphrezo Thorie-i melepzüng o jembia liasü. Iba sentong nung Additional Secretary, Department of School Education, Govt. of Nagaland, Vikhweno Chale; SDO (Civil) Jakhama, Vineikho Tetso aser Joint Mission Director, Samagra Shiksha Nagaland, Dr. Kevizakie Rio nungertem dena liasü.

Tuophema o Ungma aksü ajanga...

(TAPAK 1 NUNGI...)

Tang mesüra tesüiba mapang nunga Naga nung rongnung telungjem aginü. Naga movement tetenzükertemia Nagaland-ji ka dang alitsü ashi. Anungji, iba nükjidong dak rangloker parnoki taküm tenla. Kechiba süra, parnoki Naga nungjerji telok anasem masü saka ka dang lidaksünü. Anungji, "Tuophema aser Ungma tsüngta yimjung aksü ya yimna sanger asoshi dang masü, saka iba dang alia Nagaland songjen asoshi bilemetsüla", ta paisa ayongzük. Küm 25 sülen, kodang asenoki meyipa reprangdir, asenok rongnung kanga mejungi telesa adokogo. Temapur süshia aser telungpur süshia telok onsara. NNC nungi tenzükba tangbo joko telok 30 dak tali kümogo. Iba jagi nüburttem rajang akümer, ta pai ashi. 'Parnoki tesepep tila agi temulung süa alitsü jangrar. Parnoki kin tulu, nütüng tulu, state tulu lenir ka ama masü, saka pei tesepep tila ka nung mener pei sasa tanishir ta jembinür. Anungji, Nagaland nungbo nüburttem ajak lenir lir, tanitaker mali. Kodang sorochioker aika südir, sorochiokji majungtsü. Asen lima telok onsaraba ajanga asenok sorochiok kanga mejungi raksaogo aser tamangba yimsü, loktiliba, sobaliba, aser libaliru khenyongi ajemreptsüogö', ta Jamirisa sasasetä ashi. "British nungeri Naga nungjerji ochi tashi, tasütait, aser mapa meranga inyakba nnübur ama züngshi. Saka tanübo ni anir asenok kechi komala nisung ka aküm? Asenok shishilembaba oset, alitsüba osettem mesüka kümogo", ta paisa ashi. 'Nüburttemi telungjem (integration) indang jembir, saka Nagaland nungbo iba integration mesükba ka sayuogo. "Frontier Nagaland" aliba atema pelar aser asenoki parnok nem temoatsü agütsür. Parnokji renloktsüla aser yaritsüla, saka ibaji tamaitü tajung

asü? Kilem kasa nung yipden balala aser sorochiokdak atep balala nung kechi komala telungjem ka yanglutsü?' ta paisa asüngdanga ashi. 'Nagaland yanglushitsü atema yangi shinga marutsü. Asenoki Nagaland ya tashitait, telungjem takar aser yimjiyimjung state ka yanglutet aser iba asoshi asen lima yimjung nungdaker. Saka tanü bangdak amer (authorities) telok onsara, iyongji sarkar timi bener mouteter. Anungji, shinga dang tai tagütsüma. Ya asenok sasa yangluba mapa ka lir', ta paisa Naga lima tia indang temulung shiranga lemsatöp. 'Kechiba state ka nung bangdak yimsüsür paika ya? Bangdak shia rakzükrateмба aser amokmerenba nung dang sotaka/amdaka lir. Iba ama tetsükdaksü lia sarkar ka koda ketdangstetstü?', ta paisa asüngdanga liasü. Tanü tia ka-a, India sarkar den tenangzüktep ana yangluogo, "Framework Agreement (FA)" aser "Agreed Position (AP)" na, aser ya tang tensa nung takoktsü alibatem lir ta bilemer. Parnoki sign süogö, anungji, tang kechi nung sign süogö aji akümstübuttsüla. Khristan ka ama, asenokia shitak inyaktsü tim. India-i kanga jangja-a shiogo, "iba linük nung wako ka, temzüng ka aser Prime Minister ka dang asütsü, saka Nagaland nungbo prime minister aika aginür", ta paisa ashi. Asenok tesüiba mapang nung alir masü. Saka tanü Nagaland nungbo asen lenirtemi tesüiba indang dang jembir. Saka tang asenoki mangdang indang jembitsüla aser tarutsü len anitsü atema mangdang yanglutsü nungdaker. Asenoki inyakba yimya melenshitsüla aser kadi ka dak asen yimya melenshidaksütsüla. Kechiaser Nagaland nung asenokbo ajak dak tai dang tongloksür. 'Meimchir shinga tabensaba mali ta

bilemtetang aser kodang nai pei tashimait meteta arudir, idangji dang nai tangar timtemjia angateter', ta paisa shisem. Tuophema o Ungma atema dang masü Nagaland indang bilemba asenoki tanaben yanglushitsüla. Asenoki lanu putu nem senmang ka ama kechi tarutsü tia toktsütsü ta asübjaji tongtibang lir. 'Naga nungjerji ajak pei sasa ka ama bilem nung dang Nagaland tashi taitba aser ka kuma yanglutsü asoshi tangatetba tuluba ka yangertetsü', ta paisa ashi. Naga nungjerji asoshi tayongzükba kar ashidang, mezüngbuba nung, 'tejen pungmangtemi asenok khuret mebenokdaksütsüla, saka asenoki pungmang tasen ka pungmangdi aser ibaji ataloktsü asoshi asenok rongnung rarabangsen mesütepli, saka tepela, telungjem, terenlok, yimjiyimjung aser mangdang tasen dak renlokdi', ta paisa ayongzük. Tanabuba nung, kechi shitak? kechi tia tajung lir? Aser kechi inyaktsütsü akok? iba indang shisadangtsüla. Taoba indang mejembili kechiyong iba jagi asenok mekümzüktsü aser tejakleni anir maotsü, ta ashi. Anungji, tanü nüburttem asoshi tajangzük anguba mapatem nung shisadangtsüla. India sarkar-i asenok asoshi kechi inyaktsür ta masü, Naga nungjerji saksalema tarutsü atema akokba tashi inyaktsüla, ta paisa ayongzük. Tasembuba nung, asenoki tejakleni aotsü jangrar aser terenlok aginür, saka temelenshi arudang tintem kar adokdi sü ta arendaka tsübuva bilemer. Saka tarutsü indang bilemdangdi süra, tamakok indang mejembili, ta paisa ashi. Paisa tatem nung, asen taküm nung Tsüngremji asen tebu, asen tesayur, asen lenir aser kümtetdakba südaksütsü aser pa dak akangakanga amettsü asoshi ayongzük.

Central Jail & District Jail Dimapur nung awareness sentong ayongzük

Dimapur, Monupii/May 04 (TYO): Jail Committee züngsem Neiko Akami, Member Secretary, NSLSA; K. Hamtok Phom, D.I.G, Prisons; Solezhol Neikha, Sr. Supdt. Central Jail, Chümoukedima nung den Longshithung Ezung, Principal District & Session Judge cum Chairman, DDLSA aser Retainer Lawyer, Panel Lawyers, LADC, Dimapur nungjerji May 2, 2026 nü Central Jail aser District Jail, Dimapur semdanga awareness sentong ayongzükä liasü. Parnoki Sr. Superintendent of Jail, Chümoukedima den senden ka mezüng amen aser iba sülen tepuokdak tesem ana ya semdanga yangji alir asoshi awareness sentong ayongzükä liasü. Iba mapang parnoki ki o jen aser tepuokdak alirtem asoshi teyari maparen nung rangloker jembishinü aka aser moziiki nung security mechi UTPs cell asoshi iron bar door inoktsü atema Medical Superintendent, District Hospital dangi abentsü telemtetba agi. Tang Central Jail nung UTPs 109, Convicts 55, NSA detention 16, PITNDPS detainees 7, ajak agi 185 yua lir. Iba mapang tepuokdak alir nisung 26 nem legal aid agüja liasü. Jail-isa tepuokdak alirtem nem computer training/distance education aser tailoring, carpentry, sanitary pad, LED

light yangluba, handicrafts amala mapa nung vocational training agüja arur. Item inyakshing nungi senotsü anguba ya tepuokdak alir indang account nung yuja lir aser parnok chiokba sülen agütsütsü. Iba sülen legal awareness sentong ayongzükba nung Nishela Assumi, PL menden liasü aser Neiko Akami, Member Secretary ajanga tepuokdk alirtem indang legal rights indang lemsatöpa liasü. Longshithung Ezung, Principal District & Sessions Judge, Dimapur cum Chairman, DDLSA ajanga NALSA, Mulaqat Se Nyay Tak LEGAL AID DESH indang scheme lemsatöpa mapang iba scheme kübok hopta shia tepuokdak aliba kinunger temi parok semdangi aruba mapang sensaksemtsü atema Panel Lawyers yoktsü ta ashi. Parnoki Dimapur District Jail semdanga yangji tebur asoshi barrack tasen ka yanglutsü, ward convict block aser tepuokdak alir nem training aser rehabilitation atema block/workshed yanglutsünung ajungtsü ta shia liasü. Parnokisa tetsür ward atema European toilet inoktsü aser male ward nung septic tanks ana yanglutsü nungdakba indanga shia liasü. Dimapur District Jail nung tang inmates 68 (tebur 58 aser tetsür 10) lir, aser parnok rongnungi 22 nem legal aid agüja liasü.

Angh-i Social Welfare Department den senden amen



Dimapur, Monupii/May 04 (TYO): Nagaland Angh Nand Kishore Yadav-i Department of Social Welfare den inyakyim lepa reprangshiba senden ka May 4, 2026 nü Naga Bhavan Conference Hall, Lok Bhavan, Kohima nung mena liasü. Iba sentong nung Director, Social Welfare, Tosheli Zhimomi-i state tesem balala nung maparen balala inyakba indang osang tejangja bener arua lemsatöpa liasü. Iba mapang Ministry of Women and Child Development kübok Saksham Anganwadi & Poshan 2.0, Mission Vatsalya, aser Mission Shakti densema achi-ajemtsü, tanurtem kumzükä ayuba aser tetsür nem tashi agütsüba nung rangloker scheme tongtipang tem indang lemsatöpa liasü. Iba senden nung Ministry of Social Justice and Empowerment aser Ministry of Rural Development kübok inyakshingiba, senior citizens, lemtamatar aser makamait tia

nung alirtem asoshi sentong balala yanglua inyakba indang reprangshima liasü. Child Welfare Committees, Juvenile Justice Boards aser Child Helpline services tem indanga jembia liasü. Department-i welfare schemes tem mapa kuma inyakba aser state tesem balala nung nüburttem nem item teyari agütsüba atema Angh-i pelaba lemsatöpa liasü. Pai tarutsü nung item mapa inyakshingiba nung tashi itshitsü, public awareness tajungba agütsütsü, aser department balala tsüngta amalitepa inyakba ajanga services tajungba agütsütsü ayongzükä liasü. Persons with Disabilities dak sendakba nung Angh-i Health and Family Welfare Department den teka amteper block aser yimtsüng sasep nung camps tem ayongzükä disability certificates tem agüja temsüa alirtem sorkar teyari shidak agidaksütsü ajungshia liasü.



New Delhi, May 04, 2026: State pezü aser Union Territory ka nung assembly elections agiba votes zünga osang sangdongba anogo nung New Delhi nung BJP headquarters kima BJP pusemertem benjungtepba noksa nung angur.

West Bengal nung BJP-i takok angu aser TN nung TVK-i takok angu

New Delhi, Monupii/May 04 (Agencies): West Bengal assembly election nung tang mezüng BJP-i takok nguogo aser Tamil Nadu Assembly election nung Vijay-i tentetba party tasen, Tamilaga Vettri Kazhagam-i takok ngua DMK sorkar atsüngdokogo.

West Bengal, Tamil Nadu, Kerala, Assam aser Puducherry nung assembly elections agiba votes Hombarnü zünga election osang sangdongogo.

Tamil Nadu nung actor nungi yimtenren nung ajemoksang, Vijay-i tentetba party tasen Tamilaga Vettri Kazhagam (TMK)-i menden 118 tashi nung takok ngua tesüiba küm aika yimsüsüa aruba parrry tem-

DMK aser AIADMK atsüngdokogo.

Tamil Nadu nung ruling party Dravida Munnetra Kazhagam-i tongtibang region aika nung tamakok ngua liasü. Election osang ya ajanga Tamil nungertemi DMK sorkar dak melung masüba aser senmangba politics anema vote agütsüba kuli sayur, iba denji külemi party tasen ka aginüa aliba sayur.

Ano West Bengal nung tang mezüng BJP-i takok tulu ngua Mamata Banerjee yimsüsüba menden nungi atsüngdokogo. Iba ya BJP atema takok tuluka lir.

Kerala nung VD Satheesan leniba nung Congress-i aniba UDF teloktepi takok ngua

sorkar akümtsü. Tesüiba kümstük (term) ana tashi Kerala nung Left sorkar liasü.

Assam nung Himanta Biswa Sarma leniba nung BJP-i tang agi tasembenbuba takok nguogo.

Tawa state pezü aser UT ka nung assembly election osang ya ajanga opposition ano jenjang tamajungba kümdaktsüogo.

Tongti state tem nung regional lenirtem jenjang mejungi kümogo, talisa West Bengal nung Mamata Banerjee-i aniba Trinamool Congress-i tamakok anguba aser Tamil Nadu nung MK Stalin-i aniba DMK-i tamakok anguba ajanga opposition ano tashimaitba akümtsü.

Petrol/Diesel jenjang atutsü atema OMCs-i Centre den jembidar

New Delhi, May 04 (Agencies): Petrol aser diesel ayokba nung takoksa kanga anguba nung ajemdaker Oil marketing companies (OMCs)-i totzü jenjang atutsü atema Centre sorkar den jembidar, ta osang ka ajanga metetdaksü.

"Petrol, diesel aser LPG ayokba nung kanga takoksa ngudar, ibayongji jenjang atutsü atema OMCs-i Petroleum Ministry aser Finance Ministry den mapang shia jembidar," ta sorkar ketdangser kati metetdaksü.

Petrol aser diesel totzü litre shia nung sen 2-4 atutsüa akok, ta sorkar ketdangser kati

metetdaksü.

West Asia nung rara adokba sülen Iran-i Strait of Hormuz tzüyüm lenmang shibang, aser ibaji ajanga tesüiba ita ana tsüngda totzü tazü jenjang shilem 60 dak tali tuogo.

Tang totzü tazü barrel ka nung dollar sen 110 shi kümogo. Linük aika nung petrol aser diesel jenjang kanga tuogo, ajisüaka India nungbo tang tashi jenjang matu.

State pezü aser UT ka nung assembly elections agiba votes zünga osang sangdongba sülenbo sorkari totzü jenjang kanga atutsü, ta aikati bilemer.

May 1, 2026 anogo nung

nung OMCs-i commercial gas cylinder (19 kgs) shia nung sen 993 tuogo aser tayimtsü nung atsükba totzü jenjang-a shilem 5.33 tuogo, ajisüaka tang tashi petrol aser diesel jenjangbo matu. Taküm March ita nung Petroleum Minister Hardeep Singh Puri-i, alima nung totzü tazü jenjang atuba ajanga OMCs-i petrol litre shia nung sen 24 aser diesel litre shia nung sen 30 takoksa ngudar, ta metetdakja liasü.

Ano külen opposition lenirtemia, state pezü nung assembly election tembangba sülenbo sorkari totzü jenjang atutsü, ta jembir.



May 04, 2026 nü assembly election agiba osang sangdongba anogo nung Kerala yimtiba, Thiruvananthapuram nung Congress MP, KC Venugopal-i party nung inyakterem den benjungtepba noksa nung angur.

West Bengal nung BJP-i Chief Minister tetsür ka shimtsüa akok

New Delhi, May 04 BJP tatong Tir aküm. (Agencies): BJP atema West Bengal nung takok angutsü ya kanga tongtibang liasü, kechiyong iba tesem ya Jana Sangh tentetsang, Syama Prasad Mookerjee asoba tesem lir, anungji BJP-i Bengal nung kanga tetemsü Chief Minister ka, talisa tetsür ka shimtsüa akok, ta osang ka ajanga metetdaksü.

Election atema nüboyimba mapang nung Union Home Minister Amit Shah-i, Bengal nung party-i takok ngura Chief Minister menden atema "Bengali" nunger ka shimtsü ta shiogo.

Nüboyimba mapang nung BJP-i tetsürtem nem security agütsütsü nungzuka liasü.

Tang BJP nungi tetsür Chief Minister ka dang lir (Delhi CM Rekha Gupta). Iba dak alia tawa Women's Reservation Act dak sendakba nung sorkar aser opposition kanga aitsütepogo, anungji BJP-i maangka agia tetsür ka CM shimtsüa akok.

West Bengal nung BJP nungi tetsür lenirtem rongnung tongti anaji Agnimitra Paul aser Roopa Ganguly na lir.

Agnimitra Paul ya BJP Mahila Morcha Bengal unit nung Tir inyaka liasü aser mapang tatsüka tsüngda state

Roopa Ganguly ya BR Chopra indang 'Mahabharat' nung Draupadi shilem agila lir. La tamalen Rajya Sabha MP-a inyakogo. La Bengal BJP Mahila Morcha Tir küm ana inyaka liasü.

Ano shibai metet BJP-i Chief Minister menden atema assembly nung Opposition lenir, Suwendu Adhikari mesüra state BJP Tir, Samik Bhattacharya mesüra party lenir Dilip Ghosh nunger rongnung ka dang shimtsüa akok.

Suwendu Adhikari ya taoba mapang TMC nung liasü aser Mamata Banerjee den atongtepa inyaker ka liasü. 2021 küm elections nung pai Nandigram menden nung Mamata Banerjee madak takok ngua liasü.

Ano külen Bengal BJP Tir, Samik Bhattacharya ya RSS nung tera-yanga lir aser Bengal nung party tera-ayangba nung pai tongti shilem agia lir.

Election nung regional party tem aikati Chief Minister candidate sangdonger, ajisüaka BJP-ibo chief minister candidate mesangdonger, ajioda Bengal election nunga party-i CM candidate mesangdongi toktepa liasü.

Tesempa o jembiba anema ozüng tasen menüngdaker: Supreme Court

New Delhi, May 04 (Agencies): Supreme Court-i, yimtenren lenirtem, nijatem aser organisation balalai tesempa o mejembitsüla, ta metetdaksü.

Linük nung tesempa ajanga ozüng alema inyakba mapatem inyaker, aser itemji nokdangtsü atema ozüng tapet benoktsü asoshi Centre sorkar nem tetuyuba agütsütsüla, ta mepishiba ken o angadanga mapang nung Justices- Vikram Nath aser Sandeep Mehta nati akümba bench-i, tesempa o jembiba nokdangtsü atema tang aliba ozüngtem ya teperi; timtemji item ozüng mapa küma mebenoktetba agi dang lir, ta metetdaksü.

Justice Vikram Nath-i, tesempa otem jembibaji ajanga linük temzüng nung ajak mebenoktetba agi lir," ta züngokba aser aremzüktepba

tangatetba raksatsür, ta ashi.

"Anungji temzüng tetuyuba wazüka ayutsüji sorkar teinyaktsü mapa dang masü. Democracy linük ka nung nüburtemi tazüokba alitsüla. Nija, lokti lenirtem aser rejutemi timtem adokdaksütsüsa o mejembitsüla; talisa nisung tapu balala aika meyoktepa aliba asen loktiliba ka nung tesempa o mejembitsüla," ta paisa metetdaksü.

Bench-i, "Tsükchiteptsüsa o jembiba, tesempa o jembiba mesüra tensa raksadaksütsüsa jembiba otem aziüktsü atema tang aliba ozüngtem jagi teperi. Tang onok matsüngdang benokba tebilemtsü onük ya ozüng peria maliba agi masü saka ozüngji shidak mebenoktetba agi lir," ta metetdaksü.

TAI TONGLOKJA ALIR ARUTSÜ SANGDONGER

Cr.P.C. Arlla 82 repringang
Kü matsüngdang iba tashishiba ken o yamai agütsü, tai tonglokja alir
1. Gwangudi, Treasurer Avino Pusa Directorate of Soil & Water Conservation, Kohima-7977001, Nagaland aser **2. Samzai**, Secretary Avino Pusa Directorate of Soil & Water Conservation, Kohima-7977001, Nagaland, ken o **CC No. 539494/16 U/s 138 NI Act, P.S.:** IP Estate, Delhi nung aibelen (mesüra aibelener asütsüa akok ta melung melemi bilemer) aser aputsü atema 'warrant' agütsüogo, aser tai tonglokja alir **1. Gwangudi** aser **2. Samzai** mangur, iba denji tai tonglokja alir **1. Gwangudi** aser **2. Samzai** jenadokogo (mesüra apuba nungi jenbuttsü atema atsüker) ta asütsüsa kü nem kuli agütsüogo. Anungji case **CC No. 539494/16 U/s 138 NI Act, P.S.:** IP Estate, Delhi nung tai tonglokja alir **1. Gwangudi** aser **2. Samzai**-i iba tashishiba dak sendakba nung telangzüba agütsütsü atema **10.06.2026** anogo tashi nung mesüra iba anogo matongdang iba Court matsüngdangi arutsü nüngdaker, ta sangdonger.
By Order
Sh. Arvind Tomar
Judicial Magistrate First Class (NI Act) - 07
Court No. 507, Extension Block
Tis Hazari Court, Delhi
DP/5671/CD/2026
(Court Matter)



TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 05, 2026

Hindu-i akoker

Nagaland nung yabo election takok aser tamakok anguba ya 'party' angatetba agia masü aser tamangba yimsü anemba aser manemba otsüa masü saka, talisa, election nung toktepsang nisungbaji mesüra par yimer mesüra kidong dakji tuluka keta lir, kechiyong Nagaland nung agiba election yabo Assembly mesüra Parliamentary election agirbo memesük saka yimtsüng o yimtsüng na aser kidong o kidong na tsüngda election agir amai agir, ibayongji Nagaland nungbo election mapang 'party manifesto' amshia mangur. Ajisüaka, India nung tanga state-tem nungbo nisung shia pei pei party tangatetba nung election nung shilem agir. Aji oda, koba party-i kechi tangatetba nung nokdaker aser party nükjidongji kechi ta asübaji tangar asoshibo kanga tongtibang lir. Aji oda, tawa state assembly election agiba rongnung, tanga state Assam, Tamil Nadu, Kerala aser Union Territory Puducherry nung takok anguba aser manguba otsütemji toktsür, takoker telok BJP atema jangratemtsüka aser makoker telok TMC atema tesasatsüka atalokba state-ji West Bengal ya asütsü. Aji oda, Mamata Banerjee-i aniba telok Trinamool Congress-i 2011 küm nungi tang tashi yimsü süa arur, West Bengal asoshibo telok tasen ta asütsüsa BJP telok nem nepshia kokdaksübaji, lai junga yimsü mesütetba agidangbo masü saka lai Muslim nunger tsütsü tejak tali shitsür ta BJP teloki Hindu nunger mulung akoktsüsa jembiba ajanga, West Bengal election ya party o party na tsüngda toktepba election masü saka Hindu o Muslim na tsüngda toktepba election amai ka kümduksüba agi BJP teloki West Bengal-i nempoka aita TMC telok agienogo. Aji oda, BJP ket nung election akoktsüsa am a aliba hadir tajungtibaji 'Hindu' ta asüba lir. Atangji, linük ka madak yimsü asütsü khuret benloker asünungji nübortem asoshi terenlok mapatem inyaksüba nunga sentong aika lir, ajisüaka election mapangbo BJP teloki nübortem den jembibaji terenlok mapatem inyaksüba sentongtemji masü saka India ya Hindu lima ka akümstü aser Hindu yimsüyimpong aser sobalibatem akangshia benschitsüba onüktemang tongtibang kuma jembir. Ibayongji, BJP teloki Assam aser West Bengal state-tem nung Hindu nunger mulung koka parnok tsütsü anir arutetogo. Iba jagi linük nungbo tamangba yimsü tapu balala amanger tsüngda meputep adokdaksür saka BJP asoshibo election mapang nübortem mulung akoktsü onük tajung ka kümogo. Aji oda, West Bengal nung TMC telok ya Muslim nunger telok ta BJP teloki jembia jembia, Hindu nungertem teyari ajanga BJP teloki meimlaika takok tuluka nguogo. Iba takok yabo BJP asoshi TMC madak takok anguba kisüng masü saka Muslim nunger madak Hindu nungertemi anguba takok ka asütsü. Atangji, ano Wst Bengal nung BJP teloki anguba takok ya linük nung Opposition teloktem madak takok anguba takok ka asütsü. India nung Opposition teloktem rongnung Congress serbo tatar senden nung ola sashia adokertemji TMC nungi lir aser Opposition chief minister-tem rongnung ato kilonser Narendra Modi anema sashia nokdaktetbaji Mamata Banerjee ya liasü. Aji oda, West Bengal nung BJP teloki akokba takok yagi Narendra Modi aser Amit Shah na lenisüba nung BJP telok tashi taitba kümogo. Ibaji dang masü saka Narendra Modi-i pai jembiba ama, nisung ka arishi küm 75 dak alema yimten yimsüsür menden nung mamentsü tangatetba nung ato kilonser menden toktsüra, ashiko, pai pa melen tangar masü Amit Shah nemang maangka agütsütsüa akok. Atangji, alima nung kechisarina ajak teti atema masü, pei pei mapang lir, anungji India nung Congress mapanga süiogo aser West Bengal nung Mamata Banerjee mapangang süir. Ibai BJP mapang lir aser BJP teloki par mapang nung ya India agi Hindu lima kümner. Atangji, Hindu nungertemi Hindu lima kümnbaji nisung tsütsü bilemstübo tim dang, saka India nung Hindu dak alaka tanga tamangba yimsü amangertembo melitetsüsa aküm nungbo, India ya tilaba kümadoktsü. Atangji, BJP jakzükba telok Bharatiya Jana Sangh 1951 küm tentetsang, Shyama Prasad Mukherjee ya West Bengal nungi liasü aser tanü küm 75 buba nung West Bengal nung BJP teloki yimten akümbaji, pai prokba süngjang atanger südi ta bilemstübaji tim dang asütsü.

OLEMSABANG

PEI SASA PEI TEMEYONG METEPSHIBA

~ L. Kika Pongener

Otsüla-oboula nungeri jembiba...."Pei sasa pei temeyong metepshiba"....Iba ya kanga tongtipang shin o ka lir. Pei sasa pei kibong majungba; pei telok majungba; pei yimtsür-yimer majungba indang tetla-tetshia sensa-masaa jembibaji....Pei sasa pei temeyong metepshir ta jembir. Shirnoki pei kibong majungba, pei tenzükba telok majungba aser pei yimer majungba indang jembir....Parnok dangji tamashi aser mashi-malo nisung ta ajar....Pei sasa pei temeyong metepshiba nisung ta ajar.

Kinungpur karibo pei kinungtsü majungba indang; kipoksem ajak nung aser pa aolen ajak nung tetla-tetshia jembia jajar; saka iba jembiba jagi paji jenjang atur masü; pa sasa pa jenjang alur ta metettsüla. Tebur ajaki pei kinungtsüji tetsür ajak rongnung tajungtila ta ser pa kinungtsü asütsü shimtet aser agi. Alima nung tetsür ajakji aso-ajen aser tobur tajung dangpo masütsü; saka tetsür shiaji langka-ka nungposa tenukshitsüsa sempet tajung kar lir. Ne kinungtsü dakji kechi nung tajung ka lir; aji tangaribo memetet; saka nai-bo meteta lir. Alima nung nisung shinga noklang nung noklang tetemsu (100 % Perfect) ajibo mangutsü. Ne kinungtsüji tetsür ajak rongnung na atema teyarir tetemsu asütsü....ta ser nai shimtet aser agi. Anungji ne kinungtsü majungba indang na aolen ajak nung jembia jajabaji; ne sasa ne temeyong metepshirba dang.... Aser ne sasa na mashi-malo tali shisangerba dang....Ibajagi ne jenjang atur masü ne jenjang alur ta metettsüla.

Kinungtsür karibo pei kinungpur agi tenuk masüng; kima yimdong, kipok-kisem aser la aolen ajak nung jembia jajar. Ano pei kidangi tangar kisemi arurtem danga; pei kinungpu dakji meket-meseni, lutsü-luponga, mezüngmeshia jembia sayur. Ajisuaka, nai iba amaji benschidangji tangar jagi na agia paji dang alang'ar ta menuja repranger...!!! Alima nung tebur ajakji aso-ajen tobur tajung dangpo masütsü; saka tebur shiaji langka-ka nungposa tenukshitsüsa tajung kar lir. Aji oda, ne kinungpuji kechi komala nubu ka sudir suang; saka na atema tebur ajak rongnung paji tajungtiba ta ser nai ne kinungpu asütsü shimtet. Anungji nai ne kinungpuji kanga akümstübuttsüla aser nema lur tenzüktsüla. Nai ne kinungpu majungba indang kima-yimdong, kipoksem aser na aolen ajak nung jembia jajabaji.... Ne sasa ne temeyong metepshirba dang....ta metettsüla. Nai iba amaji jembia jajaba jagi na jenjang atur masü; ne sasa ne jenjang alur; aser na mashi-malo dang tali shisanger.

Yimden yimsusur aser lokti-tentet balala nung lennir karibo pei tenzükba yimden bangdak sabang aser pei tenzükba telok tashimaitba aser majungba indang; kipok ajak nung sensa-masaa aser tetla-tetshia jembia jajar; ano lokti sabang aser yimjak nunga numadanga konang amai jembir. Iba ama terbang teli-li; pei tenzükba yimden bangdak sabang aser pei tenzükba telok akümketa, meraküta wazüka ayutsü melena; pei sasa pei amenba menden mesen-metoe mezüngmeshiba yimsusur aser lennir kaji nuburi anula-anulaa repranger aser aküm-metsübur. Ashiko, pai-bo pa tenzükba yimden aser telok tashimaitba aser majungba nungji; pabo maden amai bilema sadem-sadema aser meshi-meraka jembir asütsü.... Saka pai iba amaji jembidangji.... Nuburtemi-ibo yimden aser lokti majungbaji na majungba, nenok majungba; nenoki shitak meinyakba agi raksar aja....!!! ta dang angaar. Anungji yimden yimsusur aser lokti lennir ajaki pei nem nungloktsüba mapa nung temulung agüja, nendak-nendaka, ochishia ketdangsua inyaksüla. Yimsusur aser lennir ajaki pei amenba menden meraküta wazüka ayutsüla; aser pei sasa pei temeyong metepshia.... Pei tenzükba yimden aser lokti tetla-tetshia sensa-masaa mejembitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

May 7 nü US nung 75buba National Day of Prayer amongtsü



Yaküm May 1 anogo nung National Day of Prayer sentong nung tangokba noksa nung angur.

May 04, 2026: Tan hopta America nung Khristantemi 75buba National Day of Prayer amongtsü; America linük küm 250 ajungba mapang nung iba sentong agitsü.

Taküm küm atema shimtetba omenji "Kintem rongnung Tsüngrem sentsüwangshidakjang, putu ajaki Pa bushiang" lir.

Iba omen ya Putipuyang 16:24 nungi agitetba lir.

Osangbener den jembidang National Day of Prayer Task Force Tir, Kathy Branzell-i, tanü teimla atema lanurtemi pei tamang jenjang bushir, ta

ashi. Gen Z lanurtemia pei tamang jenjang lemsateper aser America nung alima college campus balala nung asentenshi milak jangrudar, ta Kathy-i ashi.

Kathy Branzell-i, pei taküm nung sarasademba ya yimya ka dang masü saka temeshiba yimya ka kümdaktsü atema pei alidak mesüra mapa inyakkad 'sarasadem partners' yimtetang, ta ayongzük.

Taküm National Day of Prayer sentong ya May 7 anogo nung Statuary Hall nung ayongzüka akatsü, aser iba

sentong nung Speaker of the House Mike Johnson densema yimten lenirtema aika alitsü; parnok rongnung Dr. Rob Pacienza, A.R. Bernard, Chaplain Margaret Grun Kibben aser US senate nung Chaplain Barry Black nung densema alitsü.

Iba sentong nung sayutsüngir, Will Graham-i tebou Rev. Billy Graham indang lemsateptsü aser National Day of Prayer tenzüka indang metetdaktsü.

May 7 nü CBN News-i National Day of Prayer sentongji 'live' sayutsü.

Osangtajung lemsatepba atema YouTuber ka tepuokdak ayutsü



May 04, 2026: Egypt nung YouTuber kati online ajanga Khristan osangtem lemsatepba atema pa küm 5 tepuokdak ayutsü aser mapa tasak inyakkaktsü obendang agütsüogo, ta Christian legal advocacy group ADF International-i metetdaktsü.

Coptic Khristan, Augustinos Samaan ya content creator ka lir aser YouTube nung pa indang subscribers 100,000 dak tali lir.

Khristan yimsü pusemba aser Khristan yimsü indang videos pai YouTube nung lemsateper. Iba dak sendakba nung Egypt nung Tsüngrem mezüngmeshiba ozüng kübok pa aitsüogo.

ADF International-i ashiba agi, Egyptian Penal Code kübok Arrla 98 (f) nung ajemdaker ketdangsertemi pa nem tai tonglokja liasü.

Samaan-isa tim masüba nung social media amshir aser

yimsü (Islam yimsü) mezüngmeshir, ta ketdangsertemi pa nem tai tongloktsü.

April 24, 2026 nü Samaan-i, pa anema benokba ken otemji pa nija yimsü temeden anema lir, ta shia temepishiba ken o ka agüja liasü.

ADF Director of Advocacy for Global Religious Freedom, Kelsey Zorzi-i, "Augustinos-i pa tangatetba lemsatepba atema pa anema ken o benokbaji yimsü temeden anema lir. Pei nija yimsü indang online nung lemsatepba atema temerenshi malitsüla," ta metetdaktsü.

Laisa Egypt ketdangsertem dang pa anema ken oji agienang aser pa tangsa chiokang, ta takhangba agütsüogo.

ADF International-i ashiba agi, yaküm October ita nung mezüng Samaan pua liasü. Khristan yimsü dak sendakba nung pai tasingdangba balala

langzüba indang videos lemsatepba atema pa pua liasü.

Zorzi-isa, "Egypt sorkari Khristanem aser tanga yimsü amangertemi online nung lemsatepba 'contents' balala mita repranger. Social media nung pei yimsü indang lemsatepba atema nisung aika pua tepuokdak ayur," ta metetdaktsü.

"Onoki Egypt sorkar dang Samaan anema obendangji agienang aser yimsü temeden wazüka yuang ta akhanger," ta laisa metetdaktsü.

2025 küm August ita nungi tenzüka online ajanga pei yimsü lemsatepba atema Tsüngrem mezüngmeshiba ozüng kübok aika apur. Online ajanga Khristan yimsü indang lemsatepba atema Islam yimsü toktsür Khristan yimsü agizükertem aser lanurtem aika puogo.

Tang Egypt nung nütsüng shilem 10-15 shi dang Khristanem lir.

ADF International-isa, tamalen tanur pongu tebu Khristan, Abdulbaqi Saeed Abdo-i Facebook nung Khristan yimsü indang lemsatepba atema jail nung puoka liasü.

Ajisüaka ADF International-i tiyongtsüi ia inyakba sülen ketdangsertemi pa chiok aser tangbo pa bendang linük nung lidar.

ANOGO ABEN TSÜNGREM DEN

Tsüngremer tatok

Mathi 6: 5-15

Na temenen tatok ngur liaka, mesüra temenenji ne taküm nung shilem ka ama liaka temenenji temenen. Aika asoshi tasaktibaji iba jenjang nung alibaji lir - temenenji ne taküm nung shilem ka ama aliba. Tepelaji asenok toktsür kechiaser asenoki tatok manguba temenen talenba kübok alir.

Ajaki tepela taküm alitsü meranger saka asenok temulungjang telung nung tamajung tashi aibelen tebilemba ali tashi shingaia telunglen taküm tepela angutsü makok. Tepela akatsü asoshi asen temulungjang nungi tamajung tashi ajak odaktsütsüla. Tatok manguba temenen nungi jenbua alitsü leman tajungtibaji kechi? Tongmelang! Chichiba temulung meyipa Tebu dangi oang. Ochi shia ne menentem nangzükang. Nai mejungi inyaka aliba purtem den jungteptsü merangang. Aser Tsüngrem nungi ne tatokba agizükang.

Ano O ka: Yisui ashiba tejangja O ... nenok kotaker Tebuia nenok dang atoktsü ... Amen.

Item ya shisadangang : Nai ajangshia aruba kar bilemteta na jashir asü, kuli kar ajanga nai tatok magütsütetti lir asü ? Nai Kibuba nem ajakji bendanga agütsüogo ta bilemer asü? Nai kecha meinyakkad tama tebilemstütemji Kibuba nem tama bendanga agüjang! Tang Pa taochi asoshi Pa tenüng sangang aser Pa tatokba agizükang.

O Tsüngrem, anüng temalen Na ajangketang: Na sentsüwangshi ali ajak madak lidakjang. T.Ken 57:11.

Ajem ajema liang, aser ni Tsüngrem ta metettang. Kin rongnung ni ajangkettsü alima nung ni ajangkettsü. T.Ken 46:10.

Rajasthan nung police-i Khristan pezü apu

May 04, 2026: Rajasthan state nung Hindu nung telok kati tashiyim amshia Tenla ki telungi ia tekülem sentong tagidak mapang nung timtem agütsü; iba mapang nungji Khristan pezüi parnok den raraba atema police-i puogo.

Khristan pezü jagi nisung tepsettsü merang, yimjung raksatsü aser ozüng alema tangar yimsü meyiddaktsütsü merang, ta parnok anema ken o benok.

May 3 nü osangbenertem den jembidang putir Arvind Amliyar-i, "Tiyazü nung ozü züngsem pezü anema ozüng alema inyakba ken otem benokba ya kanga tia maka. Right-wing Hindu züngsemtemi ozüng alema inyakba anema parnoki nokdakba atema parnok puogo," ta metetdaktsü.

Udaipur diocese kübok Bandaria Arogo nung putiri, "May 1 nü Kalinjara yimdak tekülem sentong tagidak mapang nung Hindu züngsem 13-i tashiyim amshia Tenla ki telungi aiba sülen timtem agütsü," ta metetdaktsü.

Kalinjara yim ya Banswara district kübok lir.

"Kibuba benjung agiba mapang nung parnok Tenla ki telungi aiba sülen mobile phone

amshia video tangoka liasü, iba sülen parnoki, Khristantemi tangartem Khristan yimsü dangi meyiddaktsür ta tai tongloktsü. Parnokisa, lokti chiyungtsü atema nashi ka tepseta liasü, ta tai tongloktsü," ta putirisa metetdaktsü.

Iba mapang nungji Khristantemi parnok nokdangtsü merangba ajanga rara adoka liasü.

"Hindu nung katibo kotari amshia amokmeren saka Khristantemi pa ket nungji kotariji rakzük," ta Amliyar-i metetdaktsü.

Iba sülen police arua Khristan pezü puer ao.

"Hindu nungertemi police station kima longkak ait. Khristantema police station jagi oa Hindu züngsemtem anema ken o agütsü saka police-i magizük," ta paisa metetdaktsü.

Khristan kati, "Onoki maneni district nung tongti ketdangsertem ajurua ken o benoktsü. Onoki iba ken o atema raratsü, kechiyong tiyazü nung onok nem tai tongloktsüogo," ta metetdaktsü.

Nütsüng million 70 shi aliba Rajasthan nung nütsüng shilem 0.15 dang Khristanem lir aser iba state nunga anti conversion ozüng lir.

AO OSHI ANGAZÜKDAK:

TANÜ ANGAZÜKTSÜBA OJANG



Yanglushi

(adv) tasen kümshia yanglu (repair, reconstruct)

* Dimapur nung lenmang ajak yanglushi.

Yangluyim

(adj) yangluba yimya (method of making)

* Kishi yangluyim memetetba agi junga meyanglutet.

OLONG PAITEP # 7494

15x15 crossword grid with numbers 1-18 indicating starting positions.

TIPLÉN

- 1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _ _ _ _
13. Yagi ajak ashioxtsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

- 1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. _ _ _ hi
16. Akümlü nungi pilar

OLONG PAITEP # 7493 TELANGZÜBA

TIPLÉN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioxtsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER



Andaman and Nicobar ketdangsürtemi May 2, 2026 nü Guinness World Record tasen ka yangluogo aser iba ya "world's largest underwater national flag" indang lir.

Radhanagar beach anasa Swaraj Dweep (Havelock Island) nung linük wako 60 by 40 metres tasazük ka tzüyim telung nung sala. Iba sentong nung Lieutenant Governor D K Joshi, Chief Secretary Chandra Bhushan Kumar, aser Director General of Police H S Dhaliwal nunger aden.

CRHSS-i Class 10 aser 12 nung takokertem tushi



Mokokchung, 4th May (TYO): Christian Residential Higher Secondary School (CRHSS), Artang Ward Mokokchung pur 2026 Nagaland Board of School Education-i agiba Class X aser XII tatidang nung takok tajung angur nem tenüngsang agütsüba sentong ka School Discovery Hall nung meraketa agiogo.

Subject balala nung distinction angurtem den ano

subject ajak nung distinction angur - Imnasangla (91.3%), Ozenla Jamir (90.5%), Wangjai Konyak (89%), Mepuyanger (84%) aser Imkongsungra (83%) parnok nem tetushi balaka agütsü.

School-i LKG nungi Class 10 & 12 tashi azünger kaketshirtem nem tenüngsang agütsü, iba den külemi tesayurtem nema tetushi agüja liasü. Iba sentong nung

osang tajung kaji school ketdangsür-i, rongsenkettsüng nung tashi maitertem yaritsü atema taruba kümsük atema Admission Fees ajema akümtsü metetdaksü.

Sentong nung school kibur Dr. Sentila, Class 10 pur tenüng nung Ozenla Jamir, Class 12 tenüng nung Shim Khiam, aser tesayur tenüng nung Imnainla-i shilem agia jemi.

Houston nung 'Moi Eti Nixhasor' ajanga sempet angu

Guwahati, May 4, 2026 (Agencies): Assamese feature film Moi Eti Nixhasor ajanga WorldFest-Houston International Film Festival 2026 nung sempet ana nguogo.

United States nung 59 buba WorldFest-Houston International Film Festival 2026 nung Moi Eti Nixhasor ajanga Best Dark Comedy atema Platinum Remi Award aser Best Editing atema Gold Remi Award angu.

Iba film ya National Award-winning filmmaker Bidyut Kotoky-i direct asü aser Gold Remi Award angubaji editor ji

Pallavi Kotoky lir. Assam nung Koduwa ta ser yimtsüng auer ka otsü nung ajemdaker iba film ya yanglu. Iba film ajanga morality aser society indang tasüngdangba aika agütsür aser tatem nung 'chichiba auer' ji shiba ta tasüngdangba arudaktsür.

Alima nung independent film festivals tejentiba rongnung kati ajiteta sempet agütsüba ya maongka ulura ta Bidyut Kotoky-i ashi.

Iba film ya senior journalist Anuradha Sharma Pujari-i chichiba atalokba otsü nung

ajemdaker yanglu aser theatre actor Gunomoni Baruah-i tongti shilem agir.

Moi Eti Nixhasor film ya National Film Development Corporation-i production house Blue River & Blue Hills den yaritepa produce asü.

Houston nung takok mangudang iba film ajanga Accolade Global Film Competition, United States nung Award of Excellence Special Mention nguogo aser ano Covellite International Film Festival 2026 atema shimteta liasü.

CM Pema Khandu-i Dheerpur nung Arunachal Niwas lapoktsü



Itanagar, May 4, 2026 (Agencies): Arunachal Chief Minister Pema Khandu-i May 3, 2026 nü New Delhi nung Arunachal Niwas lapoktsüogo.

Dheerpur nung Arunachal Niwas lapokba ajanga state sorkari sensotem yaritsü aser infrastructure ulushitsü tenangzükba sayur.

Dheerpur nung Arunachal Niwas züngsema New Delhi nung Arunachal Pradesh kiojen pezü kümogo. State sorkari tesüiba küm ter tsüngda Guwahati, Tezpur, Tinsukia, Dibrugarh, Bodh Gaya, Bengaluru aser Mumbai nung ibala infrastructure yangluogo.

Iba mapatong den sendaktepa alir ajak nem tenüngsang agütsür. Sensotem yaritsü asoshi ibala facilities kanga tongtipang lir, talisa Delhi-i medical treatment atema aortem aser kaketshirtem

asoshi kanga tajangzük lir ta CM Pema Khandu-i ashi.

Tang lapokba Arunachal Niwas nung shirangertem asoshi balaka yanglua lir aser iba ajanga sensotemi tajangzük angutsü ta pai ashi.

Iba Niwas ya Delhi University indang North Campus area anasa lir anungji Arunachal Pradesh nungi kaketshirtemi university admission mapang anenzüktsü akok ta CM Khandu-isa ashi.

Sorkari infrastructure development nung temulung agütsür aser tawa tasen tetetba district tem- Pakke-Kessang, Kamle, Lepa-Rada aser Shi-Yomi nung infrastructure aser nübo nüngdakba asadangtsü. Kasa maparen ya district tejentem nunga inyaktü ta paisa ashi.

Narendra Modi aser India sorkari Arunachal Pradesh nung infrastructure akangshiba nung yaritepa atema pelar ta CM

Khandu-isa metetdaksü.

Finance Commission of India-i ashiba nung ajemdaker Arunachal Pradesh sorkari Rs 4,900 crore nguogo. Iba sen ajanga infrastructure aser developmental maparen inyaktü ta paisa shisem.

Dheerpur nung 2,600 square metres nung Arunachal Niwas yanglua lir. Iba kidang dormitories 6 shia nung yipden trokrok lir, double-bedded rooms 18, twin-bedded rooms 35, specially designed rooms for persons with disabilities 6, separate staff dormitory, office space, spacious parking facilities, medical room aser dining hall lir.

Iba sentong nung Kiren Rijiju, Rajya Sabha MP Nabam Rebia, cabinet ministers, MLAs, Chief Secretary, ketdangsürtem aser Delhi nung alir Arunachal Pradesh nunger aden.

Iran-i US dang Strait of Hormuz nungi pila alitsü metetdaksü

Tehran, Monupii/May 04 (Agencies): Gulf nungi mainshiteti aliba rong tem talenba nungi salaba nung US-i yaritsü ta Tir Donald Trump-i ashiba sülen Iran indang mitkari United States Navy dang Strait of Hormuz nungi pila alitsü tekumdangtsü metetdaksüo.

US sepaitem strait telungi aitra amaksü aser shishilempaba rong aser totzü abenba rong tem Iran den amalitep masü tashi marakzüksüla, ta Iran mitkar telungjem tekolakba Ali Abdollahi-i Hombarnü sangdong ka nung ashi.

"Onoki bendanger armed forces tem, talisa tashiyim amshiba US army dang, parnok Strait of Hormuz leni arutsü tebilemba lira mesüra aitra amaksü ta metetdaksür," ta sangdong nung ashi.

Iran nung US-Israel rara mechi rong marakzüteti aliba linük temi mepishiba ama Project Freedom nungja agütsür campaign ka tenzüker, ta Trump-i Deobarnü ashi. Trump-i item linük dang "neutral and innocent bystanders" ta aja.

"Iran, Middle East aser United States ajungtsü mechi item linük dang parnok indang rong tem item tenokdangba agüja aliba tzi lenmang nungi onoki anir adoktsü ta shiogo, aji asünung dang parnok sadem-

sadema par business inyaksü," ta Trump-i pa indang Truth Social sapang nung post ka ajanga ashi saka pai Washington dang teyari meshiba linüktem tenüng tejangja magütsü.

"Item rong ya aika chiyongtsü aser rong nung ketdangsür aika temang anema aser mürekmejua alitsü nungdakba ajak ajema kumar. Iba operation nung meinpronger tem tia maka, tashiyim amshitsüsa akumtsü," ta Trump-i ashi.

US mitkar indang Central Command (CENTCOM)-ia iba inyakyim nung mitkar 15,000, alia ser tzüym nung aliba tayimtsü, warship aser drones 100 dak tema agi yaritsü ta ashi.

"Regional security aser alima rongsenketzüng aser ano tzüym mokdanga aliba atema iba defensive mission yaritsü nungdaker," ta CENTCOM commander Admiral Brad Cooper-i sangdong ka nung ashi.

Hombarnü United Kingdom Maritime Trade Operations (UKMTO) ajanga tang military operations aliba mechi strait nung maritime security tensa kanga majung lir ta ashi.

UKMTO-i tzüym nung senzürtem dang Oman indang territorial waters leni senzütsü ayongzük, kong US-i "security area" amenoka lir.

Iran-i par meyong dak alaka

Gulf nungi rong ajunga amai ita ana dak tema nokdanga arur, aser alima nung emergy jenjang tali kumdaksür.

US nung petrol gallon ka (3.8 liters) nung sen \$4.44 meshir, koba February 28 nü rara metenzükdang sen \$3 dang tajemba liasü.

Rara tatembang kati arutsü atema Iran-i 14-point proposal ka agütsüba sülen Strait of Hormuz azüoktsü atema tensa ya tamajungba akumer. Iranian Ministry of Foreign Affairs odongtar Esmail Baghaei-ia ketdangsür temi US counterproposal asadangba mapang lir ta ashi.

"US nungi osang ya Pakistan ajanga aru, aser tangbo ni iba ken o tejangja mashitsü, kechiaser item ken o tang asadangba mapang lir," ta Baghaei-i osangbener dang ashi. US dak tali-tabong aser meinyaktetsüsa meshiba yimya aliba yong iba proposal asadangtsü temela masü, ta pai ashi.

Iran indang nuclear sentong dak sendakba jembishinür ta osang prokshia aliba langzua, item ya tebilemba dang lir, ta Baghaei-i ashi.

"Enrichment mesüra nuclear materials indang ken o ya tebilemba dang lir, aser tangbo onoki rara jungjunga anentsü atema dang jembir, aser tarutsü tia tarutsü nung lemtetsü," ta Baghaei-i ashi.

Singapore aser NZ nati supply chains lapoka ayutsü atema nangzüktep

Singapore, Monupii/May 4 (Agencies): Singapore aser New Zealand nung lenirtemi mepetmesü adoker aliba mapang supply chain tem lapoka ayutsü atema Hombarnü tenangzüktepba ka nung sign süogo, aser ashiba agi, iba tenangzüktepba ya temulung lemtepa partner tem yongtsü nung network ka yanglutsü atema tanga linüktem asoshi model ka asütsü imlar.

Ato Kilonser Christopher Luxon-i Singapore semdangba mapang Singapore Ato Kilonser Lawrence Wong den iba tenangzüktepba yangluba nung shilem agia liasü. Middle East nung rara adoker aliba ajanga alima ajunga nung energy supply dak sendakba nung tetsükdaksü adoker aliba mapang tang iba tenangzüktepba ya yangluogo.

New Zealand indang totzü shilem asembo Singapore nung asüngteter. Essential Supplies dak sendakba nung shishilemba atema tenangzüktepba ya Middle East nung mangatettep metenzük tsüngda Wong-i taoba

küm October ita New Zealand semdangba mapang yanglur liasü.

Mepetmesü adoker aliba mapang linük ana tsüngda oset kar maneni shishilembatsü atema iba tenangzüktepba ya yangluogo, kong totzü, mozü aser kisü jensü dang amshiba osettem densema lir.

Wong-i ashiba agi, parnok meketa aliba tesemtema iba tenangzüktepba nung shilem agitsü atema pelashishia agizüksü. Paisa, Brunei, Chile, New Zealand, aser Singapore nung den tesendaktep atsülangshia oa Trans-Pacific Partnership trade deal atema Comprehensive 7 Progressive Agreement ka kümogo, ta ashi.

Alima nung temelenshi adokyonga aoba mapang Luxon-ia, iba tenangzüktepba nung shilem agitsü jangraba mulung ajemba linüktem pelashishia agizüksü ta shiogo.

"Onoki tanü tenangzüktepba yangluba ya alima nung mezüngbuba lir aser iba ya tatishitsü tajung ka asütsü," ta pai ashi.

Philippines nung menoknok 6.0 magnitude anak

Manila, Monupii/May 4 (Agencies): Hombarnü Philippines kübok Samar asetkong nung nikongdang 2:09 ako (par mapang) nung menoknok 6.0 magnitude anakogo, ta United States Geological Survey-i metetdaksü.

Menoknok indang epi centre ya province kübok tziükim nung aliba San Julian jila nungi km

73.3 pilar liasü.

Local police ketdangsür kati ashiba agi, menoknok ya ajungbena dang kanga sashia anoka liasü, ajisüaka iba lendong nung nisung yiruba osangbo kecha mali.

"Idaki police station nung kilem angenloka aliba beam tem rongnung ka raksaogo.. ni furniture kar anakshiba nguogo," ta pai ashiba den, pa aser külem ketdangsürtem ajak tsübuba agi kima nung kazütepdar, ta shisem. Philippines nung menoknok ya anogoshi amai anoker. Iba linük ya Pacific "ring of fire" nung amenoka lir asünung iba amala lendong ya mapangshia ajangshir.

Taoba küm October ita Eastern Mindanao ya 7.4 aser 6.7 magnitude tesashi menoknok ana agi anakshitsü aser iba mapang nisung ti asü.

Iba lendong majangshidang anogo ishika tejakdang central Philippines kübok Cebu province nung 6.9 magnitude tesashi menoknok ka anoka nisung 76 tepsetba den ki 72,000 raksaja liasü, ta sorkar data ajanga sayua liasü.

Kasa mapang nung Mayon Volcano pokteta adokba sülen Manila south len alirtem meyrejang aika pei talidak kidang nungi aninogo. Philippine Institute of Volcanology and Seismology (Phivolcs)-i, anentsüh, long mezüa aluba, avalanche aser lava yimzüka aluba meita atatsü asoshi tekumdangtsü metetdaksüo.

Kibong 1,500 shi tang evacuation centre tem nung jenoka lir, ta Department of Social Welfare and Development-i ashi. Albay province nung Volcano nungi mitsü aluba ajanga kibong 26,600 dak tema kongshir lir.

ATTENTION FOOD BUSINESS OPERATORS (FBOs)! ANNUAL Return anung file masü asü?

The portal for filing Annual Return (Form D1) for the Financial Year 2025-26 is now OPEN on FoSCoS.

NON-COMPLIANCE
Filing asütsü menuba atema temerenshi anogo nung **sen 100 achitsü** aser **license agientsü** akok.

Navigation Path for Filing Annual Return

- Visit <https://foscos.fssai.gov.in>
- Login to Food Businesses using your FoSCoS credentials
- Click on Fill Annual Return
- Select Year (2025-26) and proceed
- Fill and submit Form D1

APPLICABLE TO: Manufacturers (including repackers and relabellers), Exporters (Manufacturer), Importers

FILING ATEMA ANOGO TATEMSABA: 31st MAY 2026

For detailed guidance refer to **User Manual:**

State Food Safety Authority,
Department of Health and Family Welfare, Govt. of Nagaland.
For any query mail us @: foodsafetynagalandhelpline@gmail.com

Dimapur nung World Kids Athletics Day 2026 amungtsü



Dimapur, Monupii/May 4 (TYO): Nagaland Athletics Association tawabangka kübok Dimapur Athletics-i ayongzüka May 7 nü Pilgrim Higher Secondary Ground, Kuda B, Dimapur, nung World Kids Athletics Day 2026 amungtsü.

Tanurtem athletics asayatsü, shi temang anema alitsü asoshi ajungmesotsü aser lanuwa nungi asayartem asaya balala nungi anitetsü nükjidong nung iba sentong ayonger.

Asaya & Activities**balalatem:**

Under 8: 5 Meter Approach Run Long Jump

Under 10: 60 Meter Sprint
Under 12: Kids Javelin Throw
Asayamung nung shilem agitsüpurtem anepdang 8 ako nungi 9 ako tashi nung arishi küm asadangtsü, aser asayamung nung shilem agitsüpurtemi Aadhaar Card mesüra Birth Certificate amala kuli kaket tejangja bener arutsüla.

Asayamung nung tetsür aser teburtem arishi küm telemsa category asem tashi lemsar asayatsü.

Asaya nung takok anguba aser shilem agiba atema kuli kaket agütsüsü.

Iba asayamung ya athletics lokti tentet balala den longjemer ayongzüker.

Shilem agitsü atema tenüng züngoksemtsü asoshi tatemangbuba anogoji May 6 asütsü aser tejangrartemi iba sentong poster nung agüja aliba official QR code amshia züngoksemtetsü.

Osang tejangjaba agitsü atema iba number: 8787852190 nung tongteprateptetsü.

Dimapur Athletics-i, school, tsürapur aser tanur asayartem iba asayamung nung shilem agitsü atema pelashishia jaokogo.

Tuensang District Football Association-i metetdaksür

Dimapur, Monupii/May 4 (TYO): Tuensang District Football Association-i football asayamungtem atema aser club tem züngoksemtsü asoshi application tem jaokogo.

District nung football asaya ajungkettsü aser grassroots jenjang nungi iba asaya tashi itshidaksütsü nükjidong nung iba jenjang ya agir.

Kasa sangdong ajangasa association-i, asayamung ajak atema züngoksemtsüji mandatory asütsü, koba asayayonga aruba asayamungtem aser asayamung tasen ajak atema asütsü, ta metetdaksüogo.

Asayamung ayongzüksü janrartem aser shirnoki

football asayamungtem ayongzüka arudar parnokia, asayamung tenüng, asayamung yimya (knockout or league), kümsük balala category, asayamung ayongzüka asayatsüba tesem, senpet aser asayamung ayongertem osang tejangja agütsüsü nüngdaker.

Maneni association-i football club tem dang, club tenüng, club tenzüka küm, address, contact osang, ketdangpurtem aser asayar kwi, kümsük category, takoktem, asayamung nung shilem agiba osang aser official jersey sentsüh amala osang tejangja meshiogo.

Ano club tem dang, club

indang temzüng ozüng, maitsü jangjatsü kuli aser registration form den formal application benoktsü metetdaksüogo.

TDFA-isa, applicant ajaki parnoki agütsüba osang ya shitak ta shia declaration ka benoktsüla aser association indang temzüng ozüng sülen tashi anga anidaksü nangzüksüla, ta shiogo.

Asayamung ayongtsü janrartem aser club temi association ket nungi form agizüka May 31, 2026 tashi nungbo benoktsü metetdaksüogo.

Osang tejangjaba agitsü atema item number: 8787654409 mesüra 7005656322 den tongteprateptetsü.

Inter Milan-i Serie A 21benbuba kokogo

Monupii/May 4, 2026 (Agencies): Deobarnü San Siro nung Parma goal 2-0 agi akokba sülen Inter Milan puri season trok nung Serie A title tasembuba benogo. Parnoki ajak senteper Serie A ya 21benbuba kokogo.

Taoba season tatem tashi tokoker mejangjai toktepba asayaba ama masü takumbo ita aika tejakdang nungi parnok tejakdang ser asaya aruogo.

Napoli aser AC Milan na prongla tetsükdaksü ajangshiba sülen Inter puri parnok ajateta atu aser parnok meneptsü tamakoktsü aküm. Asaya asem asayatsü anunga

lia Inter pur Napoli dang nungi point 12 aser Milan dang nungi point 15 agi timba lir.

Deobarnü asaya nung Marcus Thuram-i asaya mezüngbuba shilem nung mezüngbuba goal idaktsü aser iba sülen Henrikh Mkhitaryan-i tanabuba goal idakja parnok asaya akok. Iba sülen yimti ajunga nung fan tem benjungtep tenzüka liasü.

Stadium kima Duomo Cathedral nung nisung meyirejang aika adenshia benjungtepa liasü.

Küm ka tejakdang Inter puri tera agi dang title maben aser Champions League final

nung kanga mejungi tamakok ngua liasü.

Simone Inzaghi-i club toktsüba sülen taoba mapang Inter defender Cristian Chivu shimba ya mimlai aliba ka liasü, saka pa lenisüba nung squad ya kanga junga melenshiogo.

Taoba küm lemluwa pa shimba ya ajakibo temulung meleme liasü, saka club asoshi tapet liasü.

Inter pur ano May 13 nü Rome nung Lazio den Coppa Italia final asayatsü lir, anungji asayamung tongtimbang ana koker season tembangtsü maongka lir.

North Korea tetsür team ka South Korea nung oasayatsü

Monupii/May 4, 2026

(Agencies): North Korea nungi football team kati iba ita tatemlen South Korea semdangtsü.

North Korea club Naegohyang nungi asayartem arrtsü adena or May 20 nü Suwon den Asian Women's Champions League semi-final asayatsü.

Pyongyang-i asayar 27 aser staff 12 indang tenüng agütsüogo, shirnoki South Korea semdangtsü.

South Korea indang Unification Ministry-i, North Korea nung team kati linük semdangtsü aliba indang jangjatsüogo, koba 2018 küm sülen North nungi asayartem arrtsü adena or South semdangba mezüngbuba asütsü.

North Korea-i, 2018 küm Pyeongchang Winter Olympics nungi shilem agitsü atema South Korea-i asayartem yoka liasü. Iba küm linük ana senteper mezüngbuba ice hockey team ka yanglur asaya

liasü.

South Korea tir Lee Jae Myung-i North Korea den tesendaktep yanglushitsü atema merangba mapang tang iba team yagi South semdangtsü lir.

Küm ishika tsüngda North Korea-i South Korea ya parnok tsükchir tulutiba aser linük ana longjemtsü atema minyaksü ta shia linük ana tsüngda tesendaktep tamajungba kümer lir.

Korea linük ana ya rara nung dang lir, kechiyong 1953 küm Korea rara tembangba mapang linük ana tsüngda yimjung atema tenangzüktepba yanglua mali.

Naegohyang team ya tang mezüngbuba Champions League nung asayar. Parnoki quarterfinal nung Vietnam indang Ho Chi Minh City team 3-0 agi koka liasü.

Team ana asayaba sülen takoker ya final nung Melbourne City mesüra Tokyo Verdy den asayatsü. Team ana ya-a Suwon nung May 23 nü asayatsü.

Spurs pur relegation zone nungi tuguogo; United pur UCL asayatsü

Monupii/May 4, 2026

(Agencies): Ita ishika tsüngda Tottenham puri Deobar nü junga asayateta Aston Villa goal 2-1 agi koka parnok relegation zone nungi tuguogo.

League nung anogo 118 tashi asaya ka danga mekoki asayaba sülen parnoki taoba hopta-ang Wolves pur akok aser tang ano asaya anabuba atonga akokba sülen parnok jenjang junga kümogo.

Europa League semi-final asayatsü aliba temulung dang yur Unai Emery-i aniba Villa team nung iba asaya atema asayar tenet tashi melena liasü.

Parnok tang asaya aliba season nung mapang talangka junga masayateti aruogo, saka kanga dang tongtimbang mapang ka nung Roberto De Zerbi-i aniba team yagi tanüla tajung sayua asaya kokogo.

Iba asaya akokba sülen asaya asem dang asayatsü anunga lia parnok drop zone nungi tugua West Ham United dang nungi point ka agi timba

kümogo, ajisüaka parnok ano lendong nungibo mejenboi lir.

Kasa mapang nung Manchester United puri Old Trafford nung goal 3-2 agi Liverpool koka parnok UEFA Champions League asayatsü jangaogo.

Anogo ishika tejakdang küm pongu atema tenangzüktepba yanglushiba sülen Kobbie Mainoo-i minute 77buba nung United atema tasembuba goal idakja parnoki asaya akok.

Liverpool pur asaya mezüngbuba shilem nung goal ana chir liasü, saka asaya tanabuba shilem nung parnoki goal anaprongla küptok, ajisüaka Mainoo indang goal yagi takoker bendanga liasü.

Iba asaya akokba densema Michael Carrick lenisüba nung United puri asaya 14 nung asaya 10buba kokogo.

Champions League atema qualify asüba sülen coach mapa atema tenangzüktepba yanglutsü asoshi Carrick jenjang junga kümogo.

BILEMDANGANG

"Na kanga meyilongi tejakleni oaka memerangdang dang nungibo tejakdang asütsü."